

# САБАҚ 6 Сіздің ұстанатын жаңа қағидаларыңыз

---

Адамдар бір-бірімен қатар өмір сүру үшін белгілі бір ережелер немесе қағидаларды ұстануы керек. Мысалы, бірнеше балалы отбасыны көз алдыңызға елестетіп көріңізші. Үлкен балаларына түнімен шулауға рұқсат етілсе не болар еді? Ешкім дұрыс демала алмас еді. Сондықтан күнделікті өмірімізде белгілі бір ұстанатын қағидалар қажет.

Егер адам ерекше мақсатқа жетуге ұмтылса, оған ұстанатын қағидалар керек. Мысалы, атлеттер өзінің жаттықтырушысының нұсқауларын орындайды. Олардың мақсаты – жүлдені жеңіп алу үшін керекті шеберлік пен күшін дамыту. Мәсіхші бола тұрып, сіз ерекше, жаңа мақсат табасыз: Көктегі Әкеңіз сізді қандай қалыпта көргісі келсе, сондай болу. Бұл сізге жаңадан ұстанатын қағидалардың қажеттігін көрсететін тағы бір себеп.

Көктегі Әкеңіз сіздің Өз отбасының мүшесі болуыңызды және өміріңізге қатысты мақсаттарға жетуіңізді қалайды. Осы сабақ Құдайдың сізге көмектесу үшін берген жаңа қағидаларын түсіндіреді. Осы қағидаларды ұстану сізге үлкен пайда әкеледі.

## ***Сіз осы сабақта келесі тақырыптарды оқып білесіз.***

---

- А. Өмірлік қағидаларды кім орнатады?
- Ә. Осы қағидаларды сіз қайдан табасыз?
- Б. Құдайдың қағидаларына сай қалай өмір сүре аламыз?
- В. Осы қағидалар сізді жетістікке жетелейді.

## ***Осы сабақтың мақсаты***

---

1. Құдайдың сіз үшін орнатқан қағидаларын суреттеу.
2. Құдайдың қағидаларын қалай ұстана алатыныңызды түсіндіру.
3. Құдайдың қағидаларына сай өмір сүру арқылы жететін нәтижелерді атау.
4. Табысты өмір сүруді сипаттау.

## **А. ӨМІРЛІК ҚАҒИДАЛАРДЫ КІМ ОРНАТАДЫ?**

**1 Мақсат.** Құдайдың қағидаларын қалай ұстана алатыныңызды түсіндіру.

Үйде балаларының қалай жүріп-тұратындарын белгілейтін қағидаларды ата-аналары орнатады. Балалар тез арада осы қағидаларға немесе ережелерге сай өмір сүру керектігін меңгеріп алады. Балалар ережелерді бұзған жағдайда, ата-анасы түзетеді. Ал егер де балалары қасарысып, одан әрі тындамаса, онда ата-анасы оларды тәртіпке салуы мүмкін. Дегенмен балалар отбасының мүшесі болып қала береді, бірақ тілазарлығы қиындықтар мен қайғы-қасірет алып келеді.

Біздің Көктегі Әкеміз де Өзінің балаларына не істеу керек және не істемеу керек екенін көрсететін қағидалар орнатты. Кейде Оған да Өз балаларын тәртіпке салуға тура келеді.

## Тапсырма

---

- 1** Жақсы ұйымдастырылған үйде ұстанатын қағидаларды ... орнатады.
- а) балалар
  - ә) көршілер
  - б) ата-аналар
- 2** Мәсіхшілер мінез-құлыққа бізді үйрету құқығы ... тиесілі.
- а) біздің Көктегі Әкемізге
  - ә) біз өмір сүретін мәдениетке
  - б) бізге



## Ә. Осы Қағидаларды Сіз Қайдан Табасыз?

**2 Мақсат.** Құдайдың қағидаларын қалай ұстана алатыныңызды түсіндіру.

Адамның мінез-құлқын бақылау арқылы ұстанатын қағидаларын көреміз. Мәсіхшілік мінез-құлық қағидаларын қалай анықтай аламыз? Біз Иса Мәсіхтің қалай өмір сүргенін бақылау арқылы мәсіхшілік мінез-құлық қағидаларын үйренеміз. Киелі Кітап бізге Исаның өмірін баяндайды. Ол – біздің мінсіз өнегеміз және өмір сүру үлгіміз.

Мәсіхшілік қағидаларын біз Исаның олар туралы айтқан сөздерінен үйрене аламыз. «Таудағы уағызында» (Матай жазған Ізгі хабар 5-7 тараулар) Иса мәсіхшілік мінез-құлық қағидаларын сипаттайды. Бұл Өзінің ұстанатын қағидалары еді. Оның күдіретті күшімен бізде әрекет етуі арқылы сол мінез-құлық қағидалары біздікі де бола алады.

Құдайдың орнатқан мінез-құлық қағидаларын ұстанғандарға Құдай ерекше жарылқау беретінін айтумен Иса Өзінің уағызын бастады. Ол басқа да маңызды тәлімдер берумен жалғастырды. Төменде Оның айтқан кейбір тәлімдері:

## Таудағы уағыз: Матай 5-7

«Құдай алдында құр алақан тұрғандар бақытты:  
Құдайдың Патшалығы сондайларға арналған!

Күнәларына өкініп қайғырғандар бақытты:  
Құдай оларды жұбататын болады!

Кішіпейіл жандар бақытты:  
олар жерді иемденетін болады!

Әділдікті аңсап зарыққандар бақытты:  
олар қанағат табатын болады!

Мейірімділер бақытты:  
Құдайдың мейірімі соларға түседі!

Жүректері пәк тазалар бақытты:  
олар Құдайды көретін болады!

Татуластырушылар бақытты:  
олар Құдайдың рухани балалары деп аталмақ!

Әділдік үшін қудаланғандар бақытты:  
Құдай Патшалығы сондайларға арналған

Сол сияқты, сендердегі «нұр» адамдарға сәулесін төксін. Осылайша олар игі істерінді көріп, көктегі Әкелерінді мадақтап дәріптесін.

Сендер «көзге көз, тіске тіс» дегенді естідіңдер. Ал Мен сендерге айтамын: зұлымдық жасағаннан кек алма!

Сендер «Маңайындағы адамды жақсы көріп, жауынды жек көр!» дегенді де естідіңдер. Ал Мен сендерге айтамын: жауларыңды жақсы көріңдер! Өздеріңді қудалағандар үшін Жаратқан Иеге мінажат етіңдер! Осылайша көктегі Әкелеріңнің рухани балалары боласыңдар.

Жер бетінде өздеріңе дүние-байлық жинамаңдар! Оларды күйе жеп, тот басады немесе ұры бұзып кіріп, ұрлап кетеді. Қайта, өздеріңе байлықты көкте жинаңдар! Сол жерде оны не күйе жемейді, не тот та баспайды, ұры да бұзып кіріп, ұрлап кетпейді. Байлықтарың қайда болса, жүректерің де сонда.

Сондықтан не ішіп-жейміз, не киеміз деп уайымдамаңдар! Тәңірге мойынсұнбайтындар барлық сондай нәрселерге ие болуға тынымсыз ұмтылуда. Ал бұлардың бәрінің сендерге қажет екенін көктегі Әкелерің біледі ғой. Ең бастысы, Құдайдың Патшалығының қамын ойлап, Құдайдың әділ еркін орындауға ұмтылыңдар! Сонда көктегі Әкелерің сендерге бұлардың бәрін қосып береді».

## Тапсырма

---

**3** Кім бізге мінсіз мәсіхшілік өмір үлгісі бола алады?

- а) Сіздің бағушыңыз.
- ә) Қауымның қасиетті адамдары.
- б) Иса Мәсіх.

**4** Төменде бірнеше пікірлер берілген. Жоғарыда оқыған «Таудағы уағызы» аяттарындағы Исаның тәліміне сай келетін сөйлемдердің алдында тұрған әріптерді шеңбермен қоршаңыз.

- а) Егер бір мәсіхші бауырым мұқтаждықта болса, онда мен өз ақшаларымды жинап қоймай, оған көмек беруім керек.
- ә) Егер мен туралы біреу өтірік айтса, мен оны жек көруге құқықтымын.
- б) Егер мен мәсіхші болғаным үшін жұмысымнан айрылсам, мен қуана аламын, өйткені Құдай мені бұл жағдайда да қамқорлайды.



Иса бізге басқа адамдармен қандай қарым-қатынаста болудың негізгі ережесін берді. Көптеген адамдар оны «Алтын ереже» деп атайды. «Барлық істе де басқалар өздеріңе қалай істесін десеңдер, сендер де оларға солай істеңдер! Бұл Таурат пен Пайғамбарлар жазбаларының тәліміне сай» (Мат. 7:12).

Әрине, адамдар басқаларға жамандық жасамаулары керек деген сөзбен бәріміз келісеміз. Көптеген дінбасылары осыны айтқан. Бірақ Алтын ереже одан әлдеқайда тереңірек кетеді! Иса өзгелерге белсенді жақсылық істеу керектігімізді айтады. Өзімізге қандай қатынасты қаласақ, біз өзгелерге бірінші болып сондай қарым-қатынасты көрсетуіміз керек.

Біз өркөкірек, өзімшіл, ерегескіш және сыншыл болмауымыз керек. Біз әуелі арам құмарлықтар мен зұлым құштарлықтарға ойымыздан да орын бермеуіміз керек.

Біздің ең бірінші арманымыз – Құдайға жағымды нәрселерді іске асыру болу керек. Біз жергілікті байлықтарды және Құдайға қызмет етуді бір мезгілде басты мақсат етіп қоя алмаймыз. Егер біз Құдайды бірінші орынға қойсақ, онда Ол біздің мұқтаждарымызды толтыру үшін барлық жағдайды жасай алады. Сонымен бірге біздің Құдай үшін істеген істерімізге бола, көкте мәңгілік байлыққа ие боламыз.

## **Тапсырма**

---

**5** Алтын ережені көбірек ұстанатын адамдар – ...

- а) алдымен басқалардың өздеріне жақсылық жасағанын күтіп, содан соң оларға жақсылықтарына жақсы істерімен қайтарады.
- ә) өзгелерге жақсылық жасау жолдарын іздейді.
- б) өздері қалаған нәрселерді алудың жолдарын іздейді.

**6** Исаның тәліміне қайшы келетін әрекеттеріңіз бар ма? Өміріңізде істегіңіз келген өзгерісті көрсететін сөйлемдердің астын сызыңыз:

- а) Өзіңізге жамандық жасаған адамдарды кешіру.
- ә) Мұқтаждарға жомарттықпен беру.
- б) Сізден сеніміңізге бола бас тартқан адамдар үшін сиыну.
- в) Адамдар үшін жақсылық істеуді ойлану және соны іске асыру.
- г) Өз отбасыңызда және қоғамда татуластырушы болу.

---

## **Б. Құдайдың Қағидаларына Сай Қалай Өмір Сүре Аламыз?**

**3 Мақсат.** Құдайдың қағидаларына сай өмір сүру арқылы жететін нәтижелерді атау.

Иса ешкімнің осы ережелерді Құдайдың көмегінсіз орындай алмайтынын анық білді. Сондықтан Ол шәкірттеріне Көктегі Әкеден сиынып, көмек сұрауды үйретті. Бесінші сабақта сіз сиыну үлгісі «Иеміздің мінәжаты» жайлы үйрендіңіз. Құдай сізге қандай көмек көрсетпек?

Құдаймен өмір бөліскендіктен, сіз Көктегі Әкеңіз сияқты бола аласыз. Қалайша? Сіздің Әкеңіз Киелі Рухын сізде өмір сүру үшін жіберді. Осылай Құдай сізбен өмірімен бөлісті. Менің өмір сүруім Құдайдың қалауындай болмайды деп уайымдамаңыз. Ол Өзі сізге көмектеседі. Бұл туралы келесі сабақтан егжей-тегжейлі үйренесіздер.

## **Тапсырма**

---

**7** Бесінші сабақта берілген «Иеміздің мінәжатын» қайта қарап шығыңыз. Осы мінәжатында Иса бізді ... сиынуды үйретеді.

- а) әулиелерге
- ә) Құдайға, біздің Көктегі Әкемізге
- б) біздің ата-бабаларымыздың аруақтарына



## **В. Осы Қағидалар Сізді Жетістіктерге Жетелейді**

**4 Мақсат.** Табысты өмір сүруді сипаттау.

Өзінің нұсқаулары табысты өмір сүрудің негізгі шарты екенін Иса бізге білдірді. Біздің өміріміз ғимарат іспетті. Біздің ойларымыз, сөздеріміз бен істеріміз – ғимаратқа қаланатын кірпіштерге ұқсас. Осы кірпіштерді Исаның тәліміне сай қаласақ, өмір сынақтарына төтеп бере алатын мінез-құлыққа ие боламыз.

Иса берген қағидаларды ұстанбай, өзінің арманына сай өмір сүретін адам сәтсіздікке ұшырап, дауылдарға төтеп бере алмайды. Егер сіз мәсіхші ретінде табысты өмір сүргіңіз келсе, өз өміріңізді Мәсіхтің тәліміне негіздеп, Оның берген қағидаларын ұстаныңыз. Киелі Рух сізге көмектеседі.

## **Тапсырма**

---

**8** Иса бізге ... шынайы жетістікке жетесің деп үйретеді.

- а) өмірімізді Оның тәліміне сай құрсақ,
- ә) Оның бақыттылық туралы не айтқанын білсек,
- б) күнделікті көптеген мінәжаттарды қайталай берсек,



## **Өз жауаптарыңызды тексеріңіз**

---

- 4 а)** Егер бір мәсіхші бауырым мұқтаждықта болса, онда мен өз ақшаларымды жинап қоймай, оған көмек беруім керек.
- б)** Егер мен мәсіхші болғаным үшін жұмысымнан айрылсам, мен қуана аламын, өйткені Құдай мені бұл жағдайда да қамқорлайды.
- 1 б)** ата-аналар
- 5 ә)** өзгелерге жақсылық жасау жолдарын іздейді.
- 2 а)** біздің Көктегі Әкеміз
- 7 ә)** Құдайға, біздің Көктегі Әкемізге
- 3 б)** Иса Мәсіх
- 8 а)** өмірімізді Оның тәліміне сай құрсақ.